

# Yemesa wana Leleli

## Baaba Houwan

Leta ya ana toleleli alana Yemesa. He nige Yemesa toto apostolo ali gewi elulutega eluwa avaliya etega i oola. Yemesa toto ya iya Yesu talina etega ge iya toekelesiya Yelusalema wali tohouwa. (Tuwalali 15:13 ge 21:17-18 nu kite.) Nige ta aatena bubun, yaa tabam Yesu wana yaomal enaa baliman tuwenti o ebo teti i mowasi ga abwe Yemesa leta ya i leli.

Yemesa leta ya i leli ge i patuna toabulilek Yudiya gamagaliliyau elal. Yudiya gamagaliliyau hi gewi nige hi miminaa Yudiya wali labi elana. Valila tubuliyau Yudiya hi lou luwai haveyan kaiwena, inoke Yudiya hi gewi hi bwatek panuwa tomaha ge tomaha elal. I ola al, Sitibeni wana yaomal enaa, toabulilek Yelusalema hi gewi Yelusalema hi eguluwai, kaiwena Yudiya wali tapwalolo ana tohouwa hi palomwanagil (Tuwalali 8:1). Inoke Yudiya gamagaliliyau ololal o te Yemesa leta ya i patuna elal.

**1** <sup>1</sup> Nau Yemesa, Yehoba ge Babala Yesu Keliso wali totuwalali loloyowanina, leta ya ya leli ge ya patuna eliyamiu, komiu toabulilek Yudiya gamagaliliyau bolo ku miwaliwali panuwa tomaha ge tomaha elal.

Ya mulolu eliyamiu.<sup>a</sup>

## Pulowan Ta Pwawa ge Lawakik Baliya

<sup>2</sup>Taliwau ge nuwau, sauga ebo pulowan tomaha ge tomaha nuku pwawa, nuku yaliyaya-an to,<sup>b</sup> <sup>3</sup>kaiwena ku atena ebo pulowan nuku pwawa ge wami abulilek labose o ni gasisi luwai, inoke labose o palahikan i tal yawalimiu elana.<sup>c</sup> <sup>4</sup>He wami palahikan ni gangan ya, inoke wana tuwalali yawalimiu elana wami pagan gegewena ni sapu hot, ge bahi pagan waiwaisana etega nuku kakalaan. <sup>5</sup>Yaa ebo komiu etega nuwatu sasapona i kalaan, he ni awanuni Yehoba elana inoke ni pek. Yehoba iya toguyau bwagabwaga gamagalau ta gewigewi eliyala, ge wala awanun nige i huhugaan.<sup>d</sup> <sup>6</sup>Sauga gamagal o ni awanun, he alona

<sup>a</sup> 1:1 Mat 13:55; Gal 1:19; Tuw 15:23; 1Pit 1:1    <sup>b</sup> 1:2 Loma 5:3-5    <sup>c</sup> 1:3 1Pit 1:7

<sup>d</sup> 1:5 BaPa 2:3-6

wana abulilek ni awanun, bahi nuwana ni kukuyan, kaiwena gamagal toto i nuwakuyan iya i ola hoga toto mana i huven pwapwati ge i teuteu. 7-8 Gamagal lolana o wana nuwatu i lalabui ge wana ginol i gewi, inoke bahi ni nuuwatu tage Yehoba bugul etega ni pek elana.

<sup>9</sup>Toabulilek toto i gulagula ni yaliyaya-an te alana bwabwatana i gan Yehoba matanaa. <sup>10</sup>Toabulilek toto i gogomwau ni yaliyaya-an te alana Yehoba iyaka i teli lowan. Ni yaliyaya-an to, kaiwena sauga kekeisi abwe wana gogomwau ni yaomal luwai ni ola te mwawin lanina nige ana sauga i yayapu yaka i mowasi.<sup>e</sup> <sup>11</sup>Sabwelu i ha ge i yana lala, kalakalasinna kaiwena mwawin i aliga, inoke lanina i sogu yaka wana waisi i mowasi. Inoke i ola al to, sauga togogomwau iyoho wana gogomwau ana tuwalali i awaawaginol, yaka ni yaomal.

<sup>12</sup>Gamagal toto ebo pulowan i pwawa ge i palahikan, he Yehoba gamagal o ni muloluan. Ana labose i palahikan luwai, inoke molana yawal mihomihotina ni ahe, yawal o Yehoba i bateli bolo hi nuuwana-an kaiweliya.

<sup>13</sup>Ebo komiu etega lawakik ni pwawa, bahi ni babaa tage ana lawakik i neem Yehoba elana. Kaiwena nige etega bosowaina Yehoba ni palawakik tage pagan nanakina ni ginol, ge Yehoba nige gamagal etega i papalawakik. <sup>14</sup>Yaa ala lawakik ana abanem i ola hiwe: bugul etega nuuwala hot yaka nuwatu o i momolila ge i paonala. <sup>15</sup>Inoke ta olak nuwatu o elana yaka enona i masal gegi ta ginol. Inoke gegi o i bwatabwata, yaka enona i masal ta yaomal hot.

<sup>16</sup>Taliwau ge nuwau nuuwani, bahi nuwamiu ni gewagewa. <sup>17</sup>Bugul gegewena waiwaisana ge bugul gegewena bolo nige ali nak i gagan hi loem labulabumwa. Mulolu o hi neem Yehoba elana, iya mwananal bolo hawawala ali Toginol. Iya wana pagan nige i pipil, nige i oola bugul etega kakanununa sauga etega i kaubwa ge sauga etega i yapu. <sup>18</sup>Kila wasa tutunahotina iyaka ta hago inoke Yehoba totona wana nuwatu elana i ginolila ta tabwa natunau. Yehoba abwe bugul gegewena ni ginol pavavaluna, inoke i ginolila kila ginol valaluna o ta gamauni.<sup>f</sup>

### Yehoba wana Baaba Ta Laeganan ge Ta Ginol Ola

<sup>19</sup>Taliwau ge nuwau nuuwani, nuku nuwahikan te: komiu maisena ge maisena etimwawa nuku talamwagimiu nuku laegan, yaa bahi etimwawa nuku babaa houhouwa. Ge bahi etimwawa nuku huhuga, <sup>20</sup>kaiwena gamagalau wala huga pagan sasapona toto Yehoba nuwana nige i papamasal. <sup>21</sup>Inoke pagan bwaibwaikikinina ge nak bolo hi masamasal nuku towaagil, yaka ginebi ge wami hanalau Yehoba wana

<sup>e</sup> 1:10 Ais 40:6-7    <sup>f</sup> 1:18 Diyo 1:13

baaba nuku ahe, baaba o Yehoba iyaka i luwan atemiwa ge bosowaina ni pwamwalimiu.<sup>g</sup>

<sup>22</sup>Bahi tage Yehoba wana baaba nuku laeganan ya, yaa nuku ginol ola. Ebo nige nuku giginol ola, he totomiu ku kakawemiu to.<sup>h</sup> <sup>23</sup>Ebo gamagal etega Yehoba wana baaba ni laeganan bwabwage ge nige ni giginol ola, he iya i ola tau toto kakanununa i kitek gelasi elana, <sup>24</sup>yaa sauga gelasi i miluwai ge i egon, etimwawa i nuluwan ana awa ga i ola. <sup>25</sup>Wasa waiwaisana iya Yehoba wana logugui waiwaisana hot ge gamagalau i sokalil. Inoke ebo gamagal etega wasa waiwaisana ni vasili ge ni nuwanuwatu-an bubun, ge ebo toto i vasili nige ni nunuluwan yaa ni ginol ola ana baaba, he wana ginol gegewena eliyalil Yehoba ni muloluan.<sup>i</sup>

<sup>26</sup>Ebo etega i nuwatu tage iya totapwalolo waiwaisana, yaa memena nige i lologugui-an bubun, he totona i kakawe ge wana tapwalolo bugul bwagabwaga.<sup>j</sup> <sup>27</sup>Yaa tapwalolo waiwaisana ge nige ana nak i gagan Yehoba Tamala matanaa i ola hiwe: wawayau mwawamwawas aloliyau ge abuabulau ali pulowan ta wali ge ta matahikagil, ge i ola al yawalila ta matahikan bahi panayawi paganina ni papabiki.

### Togogomwau ge Togulagula ali Hehegan Bana

**2** <sup>1</sup>Taliwau ge nuwau, komiu iyaka ku abulilek wala Babala Yeisu Keliso eliyana, iya wasawasa ana Babala, inoke bahi tage bolo alaliya i gan ya te nuku yaliyaya-agil ge bolo nige alaliya yaka nuku towaagil.<sup>k</sup> <sup>2</sup>Binimala ebo towasawasa etega ana tovaha gold elana hi ginoliya ni pahe ge ana kaliko waiwaisana ni galoi, alona ge togulagula etega ana kaliko ni mamalabu, nihi ulutuk wami nogogo elana. <sup>3</sup>He ebo toto ana kaliko waiwaisana nuku hehegan bubun eliyana ge nuku ba, “U nem u misiyowa hiwe abamina waiwaisana elana e,” ge ebo nuku baek togulagula elana nuku ba, “U talmililewa tei, o ebo u misiyowa hiwe bwalala e, no abamisiyo bebenaa,” <sup>4</sup>ebo nuku ginol ola o, he komiu iyaka wami boda ku waliwali-an, ge ku ola toyatala toto wana logugui nanakina eliyana gamagalau i pakotil bwabwage.

<sup>5</sup>Taliwau ge nuwau nunuwani, nuku laegan: Yehoba togulagula panayawiya i hilel abulilek nihi gogomwau ge nihi ulutuk wana abalogugui elana, toto i bateli bolo hi nunuwana-an kaiweliya.<sup>l</sup> <sup>6</sup>Yaa komiu togulagula ku papuluwawi-agil! He togogomwau hi teli lowagimiu ge pulowan hi pahe pwtamiwa. Heliya hi momolimiu ge hi telemiu kot elana. <sup>7</sup>Heliya Keliso alana waiwaisana hi awa nanakan, alan o Yehoba iyaka i tun pwtanewa eliyamiu kaiwena komiu Keliso wana boda. Yaa age komiu togogomwau ku tobalagil!

<sup>g</sup> 1:21 Kols 3:8; 1Pit 2:1 <sup>h</sup> 1:22 Mat 7:26; Loma 2:13 <sup>i</sup> 1:25 Loma 8:2; Yem 2:12  
<sup>j</sup> 1:26 Same 141:3 <sup>k</sup> 2:1 Tuw 10:34; Yem 2:9 <sup>l</sup> 2:5 1Kol 1:26-28

<sup>8</sup> Yehoba wana abalogugui ana logugui bwabwatana i ola Buki Bwabwalena ana baaba, i ba, “Alom nu nunuwana-an ni ola totom u nunuwana-agiwa.” Ebo logugui o nuku henapuan, he ku ginol bubun to.<sup>m</sup> <sup>9</sup> Yaa ebo bolo alaliya i gan nuku yaliyaya-agil ge bolo nige alaliya nuku towaagil, he ku gegi to, ge logugui o i pwawamiu komiu logugui ana toleke.<sup>n</sup> <sup>10</sup> Kaiwena ebo gamagal etega logugui gegewena ni henapuan yaa logugui maisena ni leke, he iya iyaka i gegi i ola gamagal toto logugui gegewena i leke.<sup>o</sup> <sup>11</sup> Kaiwena Yabowaine toto i ba, “Bahi ganawal,” iya al i ba, “Bahi taulol.” Inoke ebo nige ta gaganawal yaa ta taulol, he kila iyaka logugui ana toleke.<sup>p</sup>

<sup>12</sup> Wasa waiwaisana iya logugui toto i sokalila, ge bwaliga Yehoba wala pagan ni hileya to, ebo ta henapuan o ebo nige ya. Inoke wala baaba ge wala ginol gegewena ta matahikan.<sup>q</sup> <sup>13</sup> Kaiwena gamagal toto nige alonau i aatilomwan-agil, Yehoba nige ni aatilomwan-an sauga bwaliga ni pakot ge wana pagan ni hile. Yaa gamagal toto alonau i atilomwan-agil, iya wana kot ni waisi.<sup>r</sup>

### Abulilek alona ge Ginol Waiwaisal Bana

<sup>14</sup> Taliwau ge nuwau, hauna ana waisi ebo gamagal etega ni ba tage Keliso i abulilek-an yaa pagan waiwaisana nige i giginol? Abulilek lolana o nige bosowaina ni pwamwal. <sup>15</sup> Binimala ebo talila o ebo nula etega nige ana kaliko ge nige aana i gagan.<sup>s</sup> <sup>16</sup> Ebo komiu etega ni baek elana ni ba, “Kaiyoni! Yehoba alom! Kaliko nu galoi tuwam ni waiwai, ge nu anan tinem ni kiya,” he hauna ana waisi o, ebo nige tuwana ana labe etega ni pepeki? <sup>17</sup> Inoke i ola al, ebo abulilek awawana ya ge nige alona ginol waiwaisal, he abulilek alialigana.

<sup>18</sup> Yaa tabam gamagal etega ni ba, “Gamagalau enuna hi abulilek, ge gamagalau enuna ginol waiwaisal hi ginol.” He anana na lahe na ba, “Ebo u abulilek yaa ginol waiwaisana u kalaan, he abwe ga na atena ola tage wam abulilek i gan? Yaa nau ginol waiwaisal na ginolil inoke eliyana nu atena no abulilek i gan.”<sup>t</sup> <sup>19</sup> Owa iyaka u abulilek tage Yabowaine maisena ya. He i waisi to, yaa nige ga i oolaolaek hot. Bwagana yayaluwa bibikel,+ heliya hi abulilek i ola al to—inoke hi lovakun ge hi ginu.

<sup>20</sup> Sigasiga owa, abapapatini enuna na baunaniwa, inoke nuwam ni sapu te ebo abulilek awawana ge nige alona ginol waiwaisal, he abulilek bwagabwaga. <sup>21</sup> Houhouwena elana tubula Abalahama bugul etega i ginol, inoke kaiwena Yehoba Abalahama i awa sapisapu-an. Natuna

---

<sup>m</sup> 2:8 Mat 19:19; Gal 5:14    <sup>n</sup> 2:9 Log 1:17    <sup>o</sup> 2:10 Mat 5:19    <sup>p</sup> 2:11 Tota 20:13-14; Loma 13:9    <sup>q</sup> 2:12 Gal 6:2; Yem 1:25; 1Pit 2:16    <sup>r</sup> 2:13 Mat 5:7; 18:32-35  
<sup>s</sup> 2:15 1Diy 3:17    <sup>t</sup> 2:18 Gal 5:6

Aisake i ahe i teli heyana abapowona tage i popowonan Yehoba elana.<sup>u</sup>  
 22 Yaka ta kite te wana abulilek ge wana ginol hi tuwalali toyawa, inoke wana ginol wana abulilek i pabosowan.<sup>v</sup> 23 Yaka i masal i ola Buki Bwabwalena ana baaba, “Abalahama Yehoba i abulilek-an, inoke wana abulilek kaiwena Yehoba i awa sapsupu-an,” ge i awa heliyamwi.<sup>w</sup>  
 24 Inoke ta kite nige tage abulilek awawana ya kaiwena ge Yehoba gamagal ni awa sapsupu-an, yaa gamagal wana ginol al ge kaiweliya.

<sup>25</sup>He i ola al te Leyabi, iya yova gaganawalina, bugul etega i ginol inoke kaiwena Yehoba i awa sapsupu-an. Tokenan bolo Yosuwana i patunal i ahel ge i sumel wana limiya, yaka abwe i palouil kamwasa getoga elana.<sup>x</sup>

<sup>26</sup>Inoke ta atena te ebo yawal nige i miminek tuwala elana, he tuwala iyaka i aliga. I ola al te, ebo abulilek awawana ge nige alona ginol waiwaisal, he abulilek alialigana to.

### Memen wana Tuwalali Bana

**3** <sup>1</sup>Taliwau ge nuwau, bahi nuku gegewi nuku totopankite ekelesiya gamwanaa. Iyaka ku atena sauga Yehoba gamagalau gegewela wala pagan ni hile, kila topankite wala pagan ni asimuli-an bubun.

<sup>2</sup>Gegewela sauga hi gewi ta sogu. Ebo kila nige sauga etega wala baaba ni papasogola, he kila tosapu hot, bosowaina tuwala bwalibwaligena ta logugui-an bubun.

<sup>3</sup>Sauga hihiu ta teli hosi awaliiyaa ali yabyab, yaka tuwaliya bwalibwaligena ta logugui-an ge bosowaina ta pil. <sup>4</sup>Ku nuwatu al ga waga kaiweliya. Heliya bugul bwabwatal hot ge mana gasigasisena i yu pwapwati, yaa yabyab kekeisi toyabyab i alipalo, inoke waga i pabolok o ebo i payawaten ni ola iya wana nuwatu. <sup>5</sup>I ola al te memela iya tuwala gabomwina wali tokekeisi etega, yaa bosowaina totona ni ba heyana ge ni ba, “Nau bugul bwabwatal ya ginolil.” Ku nuwatu ginaha ana kekeisi ge bosowaina ni tau ebwakil ali pwahin bwabwatana elana ge ni ton olan. <sup>6</sup>He memela i ola ginaha. Memela tuwala gabomwina etega, yaa nak i kalaopopwi yaka tuwala bwalibwaligena i papabiki-an. Memela ginahana i neem Gehena elana, yaka i topapanet yawalila gegewena i apanak.<sup>y</sup>  
<sup>7</sup>Bwasumu bolo aeliya gaganil, bolo hi youyou, ge bolo hi yawayawal, avaliyau ge moti hogaa, gamagalau bosowailiya nihi patounuwa-agil, ge iyaka hi ginol ola. <sup>8</sup>Yaa memela nige gamagal etega bosowaina ni patounuwa. Iya nak ana toginol, nige bosowaina ta lopwali, lelam alialigana i kalaopopwi.<sup>z</sup>

<sup>9</sup>Memela elana Babala, iya Tamala, ta tobalan, yaka al memela elana wala pan gamagalau ta ba panapanak-agil, heliya Yehoba i ginolil hi ola

<sup>u</sup> 2:21 Aba 22:9-12    <sup>v</sup> 2:22 Hib 11:17-18    <sup>w</sup> 2:23 Aba 15:6; 2Liw 20:7; Ais 41:8

<sup>x</sup> 2:25 Yos 2:1-21; Hib 11:31    <sup>y</sup> 3:6 Mat 12:36-37; 15:11,18-19    <sup>z</sup> 3:8 Loma 3:13

totona kanukanununa. <sup>10</sup>Tobal ana baaba ge baaba nanakina ana baaba hi tagilem awala maisena elana. Taliwau ge nuwau, binimala bahi ta oola to. <sup>11</sup>Nige sauga etega wewel amnana waiwaisana ge wewel amnana nanakina nihi sasani tagilem pat golina maisena elana. <sup>12</sup>I ola al, taliwau ge nuwau, kapoi nige bosowaina ni enon ge enona ni ola wakai, ge kamwakuku nige bosowaina ni enon ge enona ni ola kapoi. Ge nige bosowaina wewel waiwaisana ta wagem hoga elana.

### Nuwatu Sasapona Toto I Loem Labulabumwa Bana

<sup>13</sup>Henala gamwamiwa tage wana aatena i bwata ge wana nuwatu i sapu? He yawalina waiwaisana eliyana te gamagalau nihi atena tunahot iya tonuwasapu. Wana ginol ni waisi, alona ge hanalau toto i neem nuwatu sasapona elana. <sup>14</sup>Yaa ebo atemiwa alomiyau ku lamwa pulowanagil ge totomiu wami waisi ku loyaan, he bahi nuku kakakawi baaba tutunahotina elana ge nuku hahanaha tage komiu tonuwasapu. <sup>15</sup>Nuwatu ololana o nige i loloem labulabumwa, yaa i neem panayawi ya elana, wami pagan bebeyaunana elana ge Seitani elana. <sup>16</sup>Kaiwena sauga ebo gamagalau avaliyau hi lamwa pulowanagil o ebo totoliya wali waisi hi loyaan, yaka avaliyau ge avaliyau wali minamina i hanahanal, ge nak tomaha ge tomaha hi awaawaginol.

<sup>17</sup>Yaa ebo nuwatu sasapona toto i loem labulabumwa iyaka ta ahe, he houwan wala pagan i sapu, ge i ola al avalau ge avalau ta mibubun, wala pagan i meimei, avalau analiya ta hago, atilomwan ge ginol waiwaisal ta kalaopopwi, nige tage boda enuna ta nunuwana bubun elal ge enuna nige ya, ge nige ta lokalokakawi. <sup>18</sup>He ebo gamagalau avaliyau ge avaliyau hi mibubun, he i ola mibubun hi galauma-an yaka enona i pamasal wali ginol i waisi.<sup>a</sup>

### Bahi Panayawi Ta Heliheliyamwi

**4** <sup>1</sup>Hauna puna ge lohalohaveyan ge ba apwaaapwanawa i gan eliyamiu ami boda gamwanaa? Puna i ola hiwe: bugul hi gewi nuwamiu hot nuku ahe wami yaliyaya kaiwena, inoke amnan bolo o heliya iyoho hi logalogasisi tuwamiu gamwanaa.<sup>b</sup> <sup>2</sup>Bugul etega nuwamiu, yaa nige bosowaimiu nuku ahe, inoke baena ku taulol. Bugul etega ku matamomoni-an, yaa nige bosowaimiu nuku ahe, inoke baena ku ba apwaaapwanawa ge ku lohoveyan. Bugul bolo o nige ku aahe kaiwena nige ku aawanun Yehoba elana. <sup>3</sup>Ge sauga ku awanun Yehoba elana kaiweliya, nige i pepewa, kaiwena wami nuwatu i nak te ku awanun, nuwamiu bugul nuku ahe ge nuku patuwalali totomiu wami yaliyaya kaiwena.

<sup>a</sup> 3:18 Mat 5:9; Hib 12:11    <sup>b</sup> 4:1 Loma 7:23

<sup>4</sup>Togolu gegetoga komiu! Age nige ku aatena te henala ebo panayawi buguliliyau i nunuwana-agil, iya i pihigelgel Yehoba elana? Ebo etega nuwana panayawi ni heliheliyamwi, iya i tabwa Yehoba ana topihigelgel.<sup>c</sup>  
<sup>5</sup>Ku atena Buki Bwabwalena i ba bubun ya sauga i ba tage yayaluwa toto Yehoba i teli eliyala lomwaketa paganina i kalaopopwi. <sup>6</sup>Yaa Yehoba wana mulolu wala lomwaketa paganina i gasisi luwai. Hei ya te kaiwena ge Buki Bwabwalena i ba:

Bolo tohanaha Yehoba nige i yaliyaya kaiweliya,  
 yaa bolo hi hanalau i muloluagil.<sup>d</sup>

<sup>7</sup>Inoke nuku minaa Yehoba wana logugui gabulanaa. Wami lohaveyan Seitani elana nuku talmilil gagasisi, inoke ni lou luwagimiu.<sup>e</sup> <sup>8</sup>Nuku minek Yehoba labenaa, inoke iya ni minewa labemiwa. Togegi komiu, nimamiu bikena nuku ul yoho. Komiu bolo wami nuwatu i lalabui, nuwatu nanakina nuku ahok yoho atemiwa.<sup>f</sup> <sup>9</sup>Atemiu ni lomwan, nuku nuwanak, nuku kahin. Wami nival nuku pil ni na nuwanak elana, ge wami yaliyaya nuku pil ni na nuwaleyan elana. <sup>10</sup>Nuku hanalau-agimiu Babala matanaa, inoke iya ni teli heyagimiu.<sup>g</sup>

#### Awa Naknak Paganina Bana

<sup>11</sup>Taliwau ge nuwau, bahi alomiyau nuku aawa naknakagil. Ebo gamagal etega talina ni awa nanakan ge ni ba panapanak-an, yaka Yehoba wana logugui i awa nanakan ge i ba panapanak-an, kaiwena logugui o i ba bahi ni giginol ola. Ebo Yehoba wana logugui u awa nanakan, he nige u hehenapu-an, yaa i ola wana logugui u pakot to. <sup>12</sup>Yehoba bosowaina gamagalau ni pwamwalil o ebo ni apanakil, inoke iya maisena te bosowaina logugui ni ginol ge bosowaina gamagalau ni pakotil. Inoke henala owa ge alom u awa naknakan?<sup>h</sup>

#### Ba Hanahanaha Bana

<sup>13</sup>Nuku laegan, komiu bolo ku ba, “Bwaligumwa o ebo bolu naha na ga panuwa etega, ge naha minaa ga o baliman maisena, inoke naha lopalipali ge wama mani ni bwata naha pwawa.”<sup>i</sup> <sup>14</sup>Ku ba ola o, yaa nige ku aatena bwaligumwa hauna gun ni gan eliyamiu. Yawalimiu i ola gogau, sauga kekeisi ya ta kite, nige ana sauga i yayapu yaka i mowasi.<sup>j</sup> <sup>15</sup>Binimala nuku ba ola hiwe, “Ebo Babala wana nuwatu i ola, he bwaligumwa naha molu nige naha yayaomal, inoke nuwatu toto ha nuwatuan naha ginol.” <sup>16</sup>Yaa age komiu ku hanahanaha ge totomiu ku ba heyagimiu. Ba hanahanaha ololana o i nak.

<sup>c</sup> 4:4 Loma 8:7; 1Diy 2:15    <sup>d</sup> 4:6 BaPa 3:34; 1Pit 5:5    <sup>e</sup> 4:7 Epe 6:12    <sup>f</sup> 4:8 Sak 1:3; Mal 3:7; Ais 1:16    <sup>g</sup> 4:10 Yobi 5:11; 1Pit 5:6    <sup>h</sup> 4:12 Loma 2:1; 14:4    <sup>i</sup> 4:13 Luke 12:18-20  
<sup>j</sup> 4:14 BaPa 27:1; Same 39:5,11

<sup>17</sup>He i ola hiwe. Ebo gamagal etega i atena binimala pagan waiwaisana etega ni ginol, yaa nige i giginol, he iyaka i gegi to.<sup>k</sup>

### Togogomwau ali Lahi Bana

**5** <sup>1</sup>Komiu togogomwau, nuku laegan. Ku kahin loloi, kaiwena pulowan bwabwatal abwe nuku pwawa. <sup>2</sup>Wami gogomwau nihi mowasi, ge ami kaliko mwatamwata ge ginapal nihi an.<sup>l</sup> <sup>3</sup>Wami gold ge silba pwaha ni apapanak-an. Inoke lan yatala elana, pwaha o wami gegi ni pamasal bubun, inoke ni apapanak-agimiu ni ola ginaha ge nuku kalas. Sauga mowamowasena iyaka i kelaubwa, yaa komiu iyoho ya wami gogomwau ku bugubugul pahipahi. <sup>4</sup>Totuwalali bolo hi lovetomwa ge hi pahi wami eyowaa nige ku pwapwamolal bubunil. Wali lovehawol i bwata nuku hago. Hi yoga balbalgig, ge analiya Yehoba Tomihahaina iyaka i hago.<sup>m</sup> <sup>5</sup>Wami minamina panayawiya, bugul waiwaisana gegewena ku kalaopopwi, ge ku yaliyaliyaya ya. Ku an tabwatabwa, yaa ami lol ana sauga iyaka i vin.<sup>n</sup> <sup>6</sup>Gamagalau waiwaisal ku nuwamutagil ge ku ba nihi yaomal, yaa heliya nige hi tatagalahi eliyamiu.

### Pulowan ana Palahikan Bana

<sup>7</sup>Taliwau ge nuwau, nuku palahikan ge nuku matamatan ana siga Babala ni sikalim. Ku atena toeyowa i palahikan, inoke i matamatan sabwelu ge kehe ali sauga ge aanan waiwaisana ni siun wana eyowa enona.<sup>o</sup> <sup>8</sup>Inoke komiu al ge alomiu ge wami palahikan nuku matamatan ge atemiu ni matuwa, kaiwena Babala wana sikalim ana sauga i kelaubwa.<sup>p</sup> <sup>9</sup>Taliwau ge nuwau, bahi alomiyau nuku lolovehawol-agil, kaiwena ebo nuku ginol ola o, Babala ni payatala-agimiu. He Toyatala iyaka i nokelakelaubwa, sauga kekeisi abwe ni vin. <sup>10</sup>Taliwau ge nuwau, ku nuwatu ga palopitau kaiweliya, bolo valila Babala alana elana hi papaatena. Heliya pulowan hi gewi hi palahikan, inoke wami abaatena nuku aheya eliyalil. <sup>11</sup>Ku atena gamagalau bolo pulowan hi palahikan ta awa wawaisi-agil. Yobi wana palahikan liwanina iyaka ku hago ge ku atena wana palahikan ana abapwamowasi eliyana Yehoba i muloluan, kaiwena Yehoba atilomwan ge nuwaleyan i kalaopopwi.<sup>q</sup>

<sup>12</sup>Taliwau ge nuwau, bugul bwabwatana etega i ola hiwe. Bahi sauga etega nuku papasila. Bahi nuku ba, “O sila labulabum,” o ebo nuku ba, “O sila panayawi,” o ebo bugul etega al nuku papasila-an. Iyai ya te nuku ba, “E” o ebo “Nigeya.” Bahi bugul etega nuku papasila-an eba abwe Yehoba ni lahemiu.<sup>r</sup>

<sup>k</sup> 4:17 Luke 12:47 <sup>l</sup> 5:2 Mat 6:19 <sup>m</sup> 5:4 Log 24:14-15 <sup>n</sup> 5:5 Luke 16:25

<sup>o</sup> 5:7 Log 11:14; Yel 5:24 <sup>p</sup> 5:8 Loma 13:11-12; 1Pit 4:7 <sup>q</sup> 5:11 Tota 34:6; Yobi 1:21-22; 2:10; Same 103:8 <sup>r</sup> 5:12 Mat 5:34-37



### Awanun Tokasiyebwa kaiweliya Bana

<sup>13</sup>Tab etega gamwamiwa ana pulowan i gan? He ni awanun Yehoba elana. Tab etega i yaliyaya? He ni wona tobal. <sup>14</sup>Tab etega gamwamiwa i kasiyebwa? He ekelesiya ana tohouwa ali baaba ni patuna, inoke nihi nem nihi awanun kaiwena ge Babala alana elana tuwana nihi paenonu.<sup>s</sup> <sup>15</sup>Ebo wali awanun alona ge wali abulilek, inoke Babala tokasiyebwa ni pwamolou ge ni palut. Ebo wana gegi i gan, inoke Babala ni nuwayoho.<sup>t</sup> <sup>16</sup>Inoke wami gegi nuku pamasal alomiyau elal ge nuku awanun alomiyau kaiweliya, inoke molu nuku pwawa. Gamagal toto sasapona wana awanun ana gasisi i gan. <sup>17</sup>Ilaitiya iya gamagal lolana kila. I awanun gagasisi Yehoba elana tage bahi kehe ni lalau, inoke i ola to baliman eton ge awalehina nige kehe i lalau.<sup>u</sup> <sup>18</sup>Sauga etega al i awanun, yaka kehe i lau ge aanan hi losiun al eyowaa.<sup>v</sup>

<sup>19</sup>Taliwau ge nuwau, ebo gamagal etega gamwamiwa ni nohuwala wasa tutunahotina elana ge alomiu etega gamagal o ni en pasikal, he toto alona i en pasikal i ginol bubun to.<sup>w</sup> <sup>20</sup>Nuku nuwahikan te: henala ebo togegi etega ni pasikalem wana gegi paganina elana, yaka i pwamwalem yaomal hot elana, ge togegi o wana gegi gegewena Yehoba ni nuwayoho.<sup>x</sup>

---

<sup>s</sup> 5:14 Mak 6:13    <sup>t</sup> 5:15 Mak 16:18    <sup>u</sup> 5:17 1Kin 17:1; 18:1    <sup>v</sup> 5:18 1Kin 18:42-45  
<sup>w</sup> 5:19 Gal 6:1    <sup>x</sup> 5:20 BaPa 10:12; 1Pit 4:8